

Regional News Unit AIR Aizawl
Thursday, July 04, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Chief Minister Pu Lalduhoma hovin Mizoram State Policy Coordination Committee chuan thlai thar lei tur pahnihte Collection Centre tur an ruat fel.
- State chhunga Ration card var nei te buhfai leina man zat pun a ni anga, retailer te lawmman tihpun a ni bawk ang.
- Sawrkar laipui chuan Cabinet Committees hrang hrang a din.
- Nimin khan Russian missile leh drone ten Ukraine ah mi 4 an kaphlum a, mi 18 aia tlemloin hliam an tuar

<><><>

CM

Chief Minister Pu Lalduhoma hovin Mizoram State Policy Coordination Committee te chu nimin khan Chief Ministers Conference Hall ah an thukhawm a, thlai thar lei tur pahnihte Collection Centre tur an ruat fel.

Hmunphiah hi Policy in a lo sawi tawh angin collection centre-ah Grade A cheng 100 leh Grade B cheng 80 tea lei tur a ni a. Collection Centre hi hmun thum-Saipum, Vairengte leh Bairabiah a awm ang a. Hmuhphiah dahkhawmna tur Warehouse hi hmun hrang hrangah sak tum mek a ni bawk.

Sawhthing hi Collection Centre-ah bawk cheng 50 aia tlem lova leisak tur a ni a. Collection Centre hi Bairabi leh Sairangah te an awm ang. Sawhthing hi open market-a kalpui tur a ni a, Open market buyer an awm loh palh theih avangin a invenna atan he ruahmanna hi siam a ni.

Collection centre te hi chak taka umzui ni se an ti.

Thlai thar palite lei chungchang Data mumal tak vawn a tul avangin Data Entry Centre dahna tur pawh an rel fel nghal a ni.

<><><>

SUPPLY MINISTER

Food, Civil Supplies & Consumer Affairs Dept Minister Pu B. Lalchhanzova chuan state chhunga Ration card var nei te buhfai leina subsidy sorkarin a pek thin chu tihhnam a ni dawn a , retailer te lawmman tihpun a ni dawn tih sawiin, he ruahmanna thar hi kumin October thla atanga hman tan tum a ni a ti.

Nimin khan Aizawl Press Club-ah press conference neiin Supply Minister chuan, Buhfai kg khata subsidy cheng 25 an pek thin chu cheng 10 ah ti hniamin card var hmangtuten cheng 15 a an khul thin chu cheng 30 in an khul tawh dawn a ti a, Retailer lawmman Kg khata duli ni thin pawh cheng 1 leh duliah tih san ani tawh ang a, He subsidy ennawn hian NFSA dawngtu Card Eng leh Card Pawl hmang te a nghawng ve dawnlo ani.

Pu Lalchhanzova chuan VIP buhfai quota tihtawp a nih thu a sawi bawk a, Chief Minister, Minister, MLA leh group A officer-te tana buhfai quota lei thin chu tihtawp a, khawsak harsa lote pawh ngen chhoh zel ni se an ti tih a sawi a, an hmalakna avang hian sorkarin thlatin cheng vbch 5 nuai 25 sing 9 & 3,072/- hum in kum khatah chuan cheng vbch 63 nuai 11 sing 1 & 6,864/- a hum thei dawn a ni a ti a, he hmalakna avang hian state buhfai mamawh hi cheng vbc 80 vela in enkawl theih a beiseiawm a ti bawk.

Supply Minister chuan, tun dinhmunah card var nei zingah mi harsa tak tak an awm tih an hriat thu a sawi a, hemi chungchang chingfel tur hian hma an la a, NFSA dawng thei zingah dinhmun tha te zawnchhuaha, Card vara awm tirin, Card var hmang mek miharsa te NFSA a thun luh beihpui thlak ani ang, a ti a. Food security a awm tur thlan dan ah ramri kham mumal a har a, khawpuia cheng kum khata an chhungkaw sum lakluh cheng nuai 4 tling zo lo te chu Food Security ah hian rin luh ni se, Thingtlanga cheng kumkhata an sum lakluh cheng nuai 2 sing 5 tling zo lo te pawh Food Security ah rin lut tura hmalak chhoh mek a ni a ti.

Ration card hi economic status tehna pawimawh tak anih chho tih sawiin, Health Care, Ruangphurh, Golden Card leh thildang ah te NFSA a awm chu dinhmun harsa te tan thil hlu tak ani a, Buhfai bikah NFSA scheme hmang nghal vek theilo mahse NFSA category a thun luh thuai hi an mamawh hle a ni, a ti.

Supply Minister Pu B. Lalchhanzova'n fur kawng chhia avanga khaw tlawhpawh harsa hmun kilkhawr ami ten an nghei loh nan October thleng daih buhfai dah khawl a ni a ti.

He thu hi Akashvani corr zawhna chhanga sawiin Food Civil Supplies and Consumer Affairs Minister chuan fur kawng chhia avanga khaw tlawh pawh harsa ten buhfai an nghei lohna turin theihtawp chhuah a ni a, Mizoram hmun hrang hranga khaw tlawh pawh harsa ah an dah kim tih a sawi bawk.

Pu B. Lalchhanzova chuan buhfai stock sa engemawzat awm mahse FCI leh Open Tender atangin normal quota lei khawl ve reng ani a ti a, harsatna tawklo turah an in ngai tih a sawi a ni.



VARTALAP - NEW CRIMINAL LAWS

Mizoram Assembly Speaker Pu Lalbiakzama'n dan thar Criminal Law chu mipuite hamthatna atana siam anih ang ngeiin mipuite ngaihven tur leh hmang tangkai turin a chah.

He thu hi nimina Aijal Club-a Press Information Bureau buatsaih Dan thar chungchang zirhona an buatsaih a hmanpuina ah a sawi a, Speaker chuan dan thar chu mipuiten ngaihven a pawimawh rual in thuthar thehdarhtute nena tan ho a pawimawh a ti a, mi tinin mahni himna tura duan dan thar chu ngaihven theuh turin a ngen tih a sawi.

Pu Lalbiakzama chuan dan tharin a tum ber chu hmanlai atanga dan lo awm tawh tunlai hun nena inmil lo tam tak thlak a ni a ti a, harsatna thenkhat thuneihna in a huam chin tih chian leh dan bung leh chang hman tlak tawh loh paih a ni a ti bawk.

Mizoram IGP Pu Lalbiakthanga Khiangte pawhin thu sawiin ramchhunga hman tur hnuchhuina atana duan criminal law pathum hmang turin Mizoram Police te an inpeih fel tawh a ti a, criminal law pathum hman ve theih nan nasa taka an inbuatsaih thu a sawi a,

Mizoram Police-te training pe turin NCRB atanga trainer an chah chhuah thu leh District hrang hranga Police Officer-te chu training an lo pek lawk tawh thu leh training pe thei tur mi 100 chuang an neih tawh thu a sawi a, Mizoram Police Constable chin chunglam Criminal Law duan thar chungchangah training pek vek anni tawh tih a sawi.

IGP chuan dan thar hnuaiah FIR pawh online hmanga thawn leh dawn theih a nih tawh tur thu sawiin online a case register thei tur Mizoram District 11 atangin Police 148-te zirtirna an pek tawh thu a sawi a. Dan tharah mipui humhimna tam zawk ruahman ani tih sawiin mi tin ten ngaihven a, dan hnuaiah mahni himna tur leh tihsual theih ang te hrechiang turin a chah bawk.

DG NE Zone Pu Satish Nambudiripad pawhin thusawiin tun dinhmunah dan hluia tha tawklo tam tak a thar tha zawka thlak chuan mipuite tan himna tam zawk leh rorelna tha zawk a awm theih a beisei a ti bawk.

He Program-ah hian PIB staff,AIR staff, Doordarshan staff te leh Govt Mizoram Law College zirlaite an tel a, heng bakah hian thuthar lakhawmtute leh sawm bik mi pawimawhte an tel bawk.



LADC

Lai Autonomous District Council hnuaia Lawngtlai Chandmary Bial By-Election neih zawh taka MDC a thlantlin Pu C.Lalsawmzuala chu nimin khan LADC Chairman Pu V.L Hmuaka'n rinawmna thu tiam tirin MDC atan a lalut.

Laklulh inkhawmah hian thusawiin CEM Pu C.Lalmuanthanga, chuan LADC ah hian kalphungthar aiin kalphung dik an mamawh zawk a ti a, kalphung dik zawh turin MNF leh INC intawm Sawrkar a kal mek a, he Sawrkar hi langtlang Sawrkar anih theih nan dik tak leh fel taka rorelna kalpui ka tum ani ati a, rinawmna thu tliamtir a laklulh tak Pu C.Lalsawmzuala chu awm mai mai tir a tum loh thu leh, Dawhkan nei a, chanvo pawimawh tak a chelh tur thu a sawi bawk.

MDC thar Pu C.Lalsawmzuala pawhin thusawiin, inthlan hma atanga mipuiten rinthu a an sawi, MNF an tlin chuan LADC Sawrkar a Congress CEM hi an paihthla leh ang tih chu beiseina beidawnthlak a ni ang a ti a, LADC Sawrkar kal mek chu nghet taka a kal theih nan theihtawp chhuah in a veng tlat dawn a ni a ti a, Mi rinawm tlemte avangin LADC Sawrkar chu nghet takin a kal zel dawn ani ati bawk.

Pu C.Lalsawmzuala laklulh inkhawm ah hian LADC a MDC te bakah, Pu H.Zothangliana Ex-MLA bakah LADC hnuaia thawk Officer te leh Party mi thahnem tak an tel a. Pu C.Lalsawmzuala chu LADC CEM bakah MNF leh INC atangin lawmpuina Pangpar an hlan ani.

Heti hian tun dinhmunah LADC a Elected MDC 25 awmna ah hian MNF in MDC 13 neiin, ZPM in MDC 10 an nei a, INC leh BJP in MDC 1 ve ve an nei mek bawk ani.



CABINET COMMITTEES

Sawrkar laipui chuan Cabinet Committees hrang hrang a din. Cabinet Committee on Economic Affairs chu member 11 awmin Prime Minister Narendra Modia chuan a ho dawn a. Union Minister te Defence Minister Rajnath Singh, Home Minister Amit Shah leh Finance Minister Nirmala Sitharaman, Agriculture Minister Shiivraj Singh Chouhan, Steel Minister H D Kumaraswamy leh Panchayati Raj Minister Rajiv Ranjan Singh te member zingah an tel.

Cabinet Committee on Security pawh din niin PM Modia chuan a kaihhruai dawn a. He Committee ah hian Rajnath Singh, Amit Shah, Nirmala Sitharaman leh External Affairs Minister Dr.S. Jaishankar te chu member an ni dawn a.

Member 10 awmna Cabinet Committee on Parliamentary Affairs chu Rajnath Singh-an a ho dawn a. Cabinet Committee on Political Affairs ah member 14 awmin Prime Minister pawh telh a ni a. Appointments Committee ah PM Modi leh Union Home Minister Amit Shah te an awm bawk a ni.

<><><>

NATIONAL MEDICAL COMMISSION

Appointment Committee of the Cabinet (ACC) chuan National Medical Commission Chairperson atan Dr. B.N Gangadhar an ruat. Dr. Gangadhar hi Medical Assessment and Rating Board ah President thin a ni a. Sree Chitra Tirunal InsInstitute for Medical Sciences and Technology, Thiruvananthapuram-a Director nilai Dr. Sanjay Behari chu Medical Assessment and Rating Board President tharah ruat a ni a. An hna thar hi kum li chhung emaw kum 70 an tlin thleng an thawk ang.

<><><>

URKAINE ATTACK

Nimin khan Russian missile leh drone ten Ukraine ah mi 4 an kaphlum a, mi 18 aia tlemloin hliam an tuar. Ukraine thuneitute sawidanin Ukraine hmarchhaka awm Kharkiv chu Russia hian kapin chenna in 10 leh sumdawnna hmunte tihchhiat a ni a. Ukraine Air Force te chuan Air Defense in missile panga leh drones an kahhthlak thu an sawi a. Hetihlai hian Russia Defense Ministry chuan Ukraine ariel drones Belgorod ah panga, Bryanska ah pali leh Moscow huamchhungah pakhat an kapthla niin an sawi ve thung a ni.

<><><>